

La pld vul cumbinar la clausla da protecziun cun ina favurisasiun d'indigens

■ (sda/anr) **La fracziun da la pld è sa fatschentada il mardi cun la realisaziun da l'iniziativa d'immigraziun da massa. Ella pledescha per ina favurisasiun d'indigens empè da cifras maximalas. La favurisasiun d'indigens duai valair a partir d'ina tscherta sava.** La fracziun da la pld saja s'exprimida unanimamain per quest model, ha ditg *Ignazio Cassis* il mardi avant las medias a Berna. Ins saja persvadi ch'i existian uschia ils megliers aspects per in'englegientscha cun l'UE. La pld saja da l'avis che quai correspundia er a la voluntad dal pievel.

La favurisasiun d'indigens vul dir che las interpresas ston engaschar oravant tut persunas che abiteschan gia en Svizra. Quai capitass a partir d'ina tscherta valor da sava – in mecanissem sco il cussegl federal al propona per la clausla da protecziun. La favurisasiun dals indigens e la clausla da protecziun vegnissan pia cumbinadas, ma senza cifras maximalas.

L'administraziun duai examinar

La clausla da protecziun fixeschia cura ch'insatge haja da capitar, ha explitgà Cassis. La favurisasiun d'indi-

gens defineschia tge che haja da capitar. Sche la favurisasiun d'indigens haja da valair en l'entira Svizra u forsa be en tschertas regiuns u en tschertas branschas lascha la pld avert. Ils detagls duai l'administraziun federala examinar.

Ils represchentants da la pld vegnan a proponer en la cumissiun pre-deliberanta d'incumbensar l'administraziun d'elavurar propostas. Sch'ins chatta maioritads en la cumissiun spetgass ins cun la debatta davart la realisaziun da l'iniziativa d'immigraziun da massa fin che las propostas èn sin maisa.

Suenter la votaziun dal Brexit

Ord vista da la pld fiss quai d'avantatg damai che la votaziun en la Gronda Britannia davart restar en l'UE fiss lura passada, di Cassis. Quai simplifitgass la situaziun.

La favurisasiun d'indigens saja ina mesira qualitativa e betg quantitativa. Perquai fissan la schanzas megras che l'UE acceptass la mesira. La cunvegna davart la libra circulaziun da persunas prevedia en tscherts cas la pussaivladad d'ina favurisasiun d'indigens.